

1.UVOD:

U svom radu obrađujem temu trgovine djecom. Trgovina djecom je jedan od vidova trgovine ljudima. Jedan od problema vezanih za trgovinu ljudima jeste što se ona ne razlikuje od ilegalne migracije ili prostitucije pa ću u svom radu bolje razgraničiti ove termine jer dobro definisanje osnovnih pojmova doprinosi boljem razumjevanju problematike trgovine ljudima, samim tim i trgovine djecom.

Trgovina ljudima je globalni problem i prati je velika tamna brojka. Za trgovinu djece se veže još veća tamna brojka jer je trgovina djecom još prikrivenija od ostalih oblika trgovine ljudima. U svom radu pisaću o prevenciji trgovine djecom u okviru trgovine ljudima.

Dalje, u svom radu podiću pitanje, to jest problem definisanja djeteta jer različita zakonodavstva na različite načine regulišu dob kada dijete dobija punoljetstvo i punu poslovnu sposobnost. Navešću koji su međunarodni pravni akti najbitniji za zaštitu djece i prevenciju trgovine djecom jer smatram da se djeca moraju, i jesu zaštićena međunarodnim pravom. I države su dužne da djeci obezbjede njihova fundamentalna osnovna prava, trgovina djecom nije ništa drugo do kršenje tih prava.

Pored osnovnih dječijih prava u svom radu pišem o osnovnim oblicima trgovine djecom, i koji su to najčešći načini dječije eksploatacije, kao i mnogobrojne posljedice koje eksploatacija ostavlja na djecu. Djecu je potrebnije bolje štititi u odnosu na odrasle jer nisu sposobna da se štite sama. Govoriću o faktorima koji doprinose trgovini djecom, i sa čime se susreću djeca žrtve trgovine djecom, te sa čime se susreću djeca žrtve trgovine ako i uspiju biti spašena iz lanca trgovine djecom.

Konkretnije u svom radu ću podići pitanje statusa i problematike djece žrtava trgovine u Bosni i Hercegovini. Daću kratak istorijski osvrt na koji se način pokušava boriti protiv trgovine djecom u Bosni i Hercegovini. Djeca u Bosni i Hercegovini još uvijek nisu potpuno prihvaćena kao ravnopravni članovi društva i pisaću o toj temi: kako da se djeca što bolje zaštite i još bitnije prepoznaju kao žrtve trgovine, i šta treba da se radi kako bi se potencijalne žrtve zaštitile.

Pisaću i o značaju medija u borbi protiv trgovine djecom. U Bosni i Hercegovini se javlja potreba za obukom i postizanju veće profesionalnosti novinara koji se bave djecom žrtvama

trgovine. Ako se uopšte i bave ovom temom onda treba istaći da, prvenstveno, u BiH postoji nezainteresovanost novinara za tu temu, a ako i izveštavaju radi se senzacionalizovanju ove teme.

Nedovoljno znanje o trgovini djecom negativno utiče na kvalitet borbe protiv ove pojave i na efikasnost reakcije institucija koje se bave borbom protiv trgovine djecom. Postoji odsustvo povezanosti pojedinih sistema, organizacija i ustanova koje imaju obavezu zaštite djece i njihovih prava, što takođe predstavlja problem u borbi protiv trgovine djecom.